

Qeqertami innaallagissiorfittaarnissaq pillugu Naalakkersuisut qinnuigineqarnissaannik Inatsisartunut aalajangiiffigisassatut siunnersuut
(Inatsisartuni ilaasortaq Kristian Jeremiassen, Siumut)

Akissuteqaat

(Ineqarnermut, Attaveqarnermut Angallannernullu Naalakkersuisoq)

Siullermeerneqarnera

Kristian Jeremiassen aalajangiiffigisassatut siunnersuuteqarneranik qutsavigaara. Ukiup ingerlanerani siusinnerusukkut Qeqertami innaallagissiorfiliornissaq pillugu § 37, imm. 2 naapertorlugu apeqqut akissuteqarfigaara.

Naalakkersuisut apeqqummut tassunga isumartik uteqqikkusuppaat.

Innaallagissiorfik Naalakkersuisut aningaasaliissutinik pingaarneriunerisigut aningaasalersorneqarsinnaasoq, kiisalu Qeqertami innaallagissiorfiup sananeqarnissaata Nukissiorfiit pilersuisussaataitaneranut ilaasoq siunnersuuteqartup erseqqissaatigaa. Tamanna paatsoormik tunngaveqarpoq.

Qeqertat Nukissiorfiit pilersuisussaataitanerannut *ilaanngilaq*, siunnersuullu aningaasanut inatsit aqqutigalugu Nukissiorfinnut amerlanerusunik aningaasaliisoqarnissaanik kinguneqartussaavoq.

Ukioq manna aningaasanut inatsimmi imaluunniit 2012-imut aningaasanut inatsisissatut siunnersuummi Qeqertani innaallagissiorfiliornissamut aningaasaliisoqarsimangilaq.

Naalakkersuisut suliassaqarfinni amerlasuuni sipaarniutissanik ujarlernissamut peqquneqarput, tamatumalu peqatigisaanik attaveqarnermut aningaasaliissutissarpassuarnik pingaarnersiuisussaavugut. Taamaattumik Naalakkersuisut Nunap Karsiani aningaasaliissutinik sukannersumik pingaarnersiuisariaqarput.

Qeqertani innuttaasut atugaat, aammalu pisortat innaallagissamik pilersuinnginnerisa kingunerisaanik ulluinnarni ajornartorsiutigisimasinnaasaat paasilluarsinnaavakka.

Kisiannili nunaqarfimmi innaallagissiorfimmik pilersuinermi siaruarterivittalimmik sananissaq 5 aamma 9 mio. koruunit akornanni sanaartornermut aningaasaliissuteqarfiusussaavoq. Sanaartornermut aningaasartuutit saniatigut aamma innaallagissiorfiup ingerlanneqarneranut ingerlaavartumik aningaasartuuteqartoqartartussaavoq.

Missiliorlugu tunisassiornermut akiusoq kWh-mut (kilowatt time) 20 – 50 koruunit akornanni akeqassasoq tamatuma malitsigisussaavaa. Akiusumut sanaartonermi aningaasartuutaasussat aammalu innaallagiq qanoq annertutigisoq sullitanut tunineqarsinnaassanersoq apeqqutaasussaavoq. Nunaqarfiit mikinerusut ilaannut Nukissiorfiit pilersuiffigisaannut

assersuukkaanni akiusq taanna qaffasissorujussuvoq. 2010-imi Oqaatsuni kWh-ip ataatsip tunisassiarinera 10,89 koruunimik akeqarpoq Igalikumilu kWh-imut 5,53 koruunimik akeqarluni.

Taamaattorli akiviusup akiusup annerpaaffissaa qaangertussaammagu akiusup annerpaaffissaa ullumikkut kWh-imut 3,48 koruuniusoq taakkunani taamaallaat akilerneqartarpoq.

Qeqertani inuussutissarsiornikkut siuariartortitsinissamut periarfissat paasinarsisinniarlugit Qaasuitsup Kommuniata suleqatiginissaa Naalackersuisut kissaatigaat, taamatullu Qaanaaq eqqaalu tamaat Nunap immikkoortuini ineriartortitsinissamut periusissami ilanngunneqarnissaa eqqumaffigisorujussuarput.

Taamatut oqaaseqarlunga Naalackersuisut sinnerlugit inassutigaara, aalajangiiffigisassatut siunnersuut saqqummiunneqartoq itigartinneqassasoq.